

DIPUTADO TA DUNA CUENTA DEN PARLAMENTO Ariba Enseñanza Diamars

Tin 30 pa 40 educador di mas

ORANJESTAD(AAN)—Diputado v.d. Kuyp den su conferencia di prensa ayera tardi a duna di conoce cu diamars awor 2.30 or den parlamento e como diputado lo duna cuenta completo ariba e maneho di enseñanza, e medidanan cu gobierno tin pensa di tuma, y hasta lo tin e posibilidad cu parlamento mes lo por tuma cierto decisionnan ariba enseñanza.

El a laga sa cu e lo duna cuenta en extenso ariba maneho di enseñanza.

El a bisa cu e asunto ta tan complica cu den un paar di minuut no por splica kico ta bay haci.

"Mi por bisa cu nos ta sumamente bon prepa-

ra, nos a haya varios documento di Hulanda, y nos expertonan na Aruba a traha sumamente bon, mi a pidi nan pa bay na e departamento di planificación y usa e computer pa saca informacionnan cu ta bay demostra exactamente con e posicion di enseñanza ta y unda e problemanan ta", e diputado a laga sa.

El a splica cu ta facil pa papia manera algun politico y asina yama expertonan ta haci, pero e ta califica e hendenan aki como manipulador pasobra nan ta kere cu door di bisa cierto cos cu no tin hende cu sa mihor na Aruba. El a bisa cu e lo bin cu cifranan di com-

puter pa desbarata tur e gritamento y pensamentonan erroneo, "y di esnan cu ta experto cu mester sa minor", manipulacionnan di nan banda.

Diputado v.d. Kuyp a elabora ariba idea di gobierno pa traha klas mas grandi y pensando ariba por lo menos 30 alumno den klas. Na e momento aki ta mas o menos 25 alumno tin pa klas. Na hulanda nan a hisa esaki pa 32 den klas.

Di retironan, el a duna di conoce cu na Aruba tin maestro y maestra di mas si bay pa 30 alumno den klas. Cada aña e personanan cu tin contrato cu un aña ta ser avisa cu kizas pa e otro aña esco-

lar no mester mas di nan servicio.,,nan sa cu si no tin cambio den maneho, nan sa cu ta casi sigur cu nan ta haya nan trabao back. Awor aki, mi tin comprension pa nan, nan

ta den duda, pasobra nan ta bisa cu nan sa cu ta bin cambio den maneho, y nan sa cu un 30 pa 40 maestro y maestra di school basico lo ta di mas," el a laga sa.

Cifranan ta demostra

HOPI JOVEN CU HAYA BECA NO TA TERMINA ESTUDIO O NO TA REGRESA

ORANJESTAD(AAN)—Durante un reunion interno di Consejo Insular di Aruba e pregunta a surgi con esnan cu haya un beca ta comporta nan mes, esta si nan ta regresa, ta termina nan estudio, etc.

Cifranan compila den un resumen, ta demostra cu un cantidad representable di becadonan, sea no ta regresa o no ta termina nan estudio.

Asina na aña 1975, un total di 19 joven a haya un beca di Gobierno di Aruba. Uno di nan ta studian do ainda, cuatro a termina nan estudio y a regresa, tres a termina nan estudio

y a regresa, dos no a termina nan estudio pero a regresa y 9 no a termina nan estudio ni regresa. Dos a paga nan gastonan y uno no a hacie. Aparentemente e otronan ta pendiente, si tene cuenta cu nada ta wordo bisa di nan.

E tendencia aki ta continua atravez di añanan.

Durante e ultimo diez añanan, un total di 697 beca a keda otorga, 314 persona ta studia ainda, y 143 a termina nan estudio y a regresa, mientras 38 a termina pero no a regresa. Un total di 92 no a termina nan estudio pero a regresa, mientras cu

110 no a termina nan estudio y tampoco a regresa.

Unicamente 59 becado a paga Gobierno loke nan estudio o permanencia na Hulanda a costa y 54 no a paga. Kico a pasa cu e resto, no ta conoci atravez di e cifranan.

E aña cu mas beca a keda otorga tabata 1983, cu 110 becado di cual 99 ta studia ainda.

Ta sigui aña 1979 cu 106 becado, di cual 17 ta studia ainda, 42 a termina y regresa y diez a termina pero no a regresa.

E cifranan ta un indicacion serio encunto becanan cu ta keda otorga.



Otro siman segun e informacionnan lo cuminsa cu e trabaoan di renovacion di Aruba Caribbean Hotel cu pa hopi aña tabata Reina di hotelnan di Caribe. Den corto tempo e formularionan pa aplicacion pa trabao na e hotel a termina y na entrada tin tambe guardianan di S.O.S. kendenan tabata encarga tambe pa ricibi e formularionan. Den un conversacion cu Sr. v. Doorn di Bredero Caribbean, dentro di poco lo cuminsa cu e trabaoan y 200 pa 250 persona lo ta involvi y cu lo haci uso di varios contratista. Fin di otro otro aña tur cos mester ta cla pa re-apertura di e hotel pa e temporada di turista.

ENTREGA DI PARTI DI DIPUTADONAN Y SECRETARIO DI TERRITORIO INSULAR TA WORDO REGLA

ORANJESTAD(AAN)—Despues cu e situacion financiero a haci necesario pa medidanan wordo tuma afectando entrada di trahadornan di Gobierno, tambe entrega di parti di Diputadonan y Secretario di Teritorio Insular mester keda

Den un proposicion di 6 di April 1984, e colegio ejecutivo di Aruba ya a presenta un reduccion di entrada di diputado. Den e reunion di dia 7 di September 1984, Consejo Insular a bay di acuerdo pa establece e compensacion di Diputado na 7.106

florin bruto pa luna.

Mientras e entrega di parti di trahadornan di Gobierno a bira un hecho, lo mester establece e entrada atrobe pa e Diputadonan y mara na esaki pa e Secretario di Teritorio Insular di Aruba. Segun Bestuurscollege entrante

1 di April un Diputado mester ricibi un montante di 6.781 bruto pa luna.

E Secretario di Teritorio Insular, ya a bay di acuerdo pa su entrega a keda mara na entrega di parti di otro trahadornan y asina su salario a keda reduci tambe te 6.780.-

pa luna entrante Promer di April, den forma di voorschot, mescos cu tabata e caso cu e Diputadonan.

Awor entrega di parti di Diputadonan y e Secretario di Teritorio Insular mester keda regla formalmente.